

Golbma veardádusa

Jesús lei astu buohkaide. Son humai dakkár nai olbmui guin, geaid earát eai dohkkehan ja geat ledje mángga ládje boastut bargan eallimisttis. Muhto sii, geat navde iežaset vigiheapmin, nimmoredje.

Sii dadje: «Gehččet, makkár olbmui guin Jesús lea searválaga!»
Dalle Jesús muitalii golbma veardádusa sidjiide:



Láhppon sávza

Muhtun olbmás leat čuodi sávzza. Go son lohká daid eahkes, okta váilu. Vaikko son lea váiban, guoddá son ovccilogiovecci ávdineatnamii ja vuolgá oheat dan láhppon sávzza.

Son oheá juohke bealde, miestagiid siste ja ájarokkiin, gedggiid duohkin ja johkagáttiin. Son oheá dassáži go gullá oktonas sávzza vuollegis meahkuma ja gávdná sávzza. Dalle son illuda ja lokte sávzza sallasis. Son lokte dan olggiidis ala ja guoddá dan earáid ollái.

Go son máhccá ruoktot, de ávvuda ustibiiddisguin ja siidaguimmiidisguin. Ovttaas sii ávvudit dan, ahte láhppon sávza eallá ja ruohtada fas ovttaas earáiguin.

Seamma ládje Ipmil illuda eanet dan olbmo dihte, guhte lea vuolgán eret su luhtte, muhto bohtá ruovttoluotta, go ovccilogiovecci olbmo dihte, geat orrot birgeme su haga.



Láhppon šlánta

Muhtun nissonis leat logi silbaruda. De son láhppá ovtta dain. Son cahkkeha lámppá ja oheá miehtá viesu. Son guovlá juohke sálvui ja ráhkui, dassáži go gávdná silbaruda.

Go son lea gávdnan dan, bovde son guossái ustibiiddis ja siidaguobmenissoni. Sii boagustit ja illudit, go divrras silbaruhta gávdnui.

Seamma láhkái illudit Ipmila engelat, go olmmoš guhte lea láhppon, máhccá su lusa.



Láhppon bárdni

Muhtun olbmás ledje guokte bárdni.

Nuorat dajai áhččásis: «Go don jámát, moai árbejetne buot du opmodaga. Mun hálidan iežan oasi juo dál.»

Dalle áhčči jugii opmodagas bárdnii-de, beali goabbái nai.

Moadde beaivvi manjel nuorat bárdni vuvddii buot opmodagas. Son vulggii vieris eatnamii. Doppe son skihtardii buot rudaidis badjelmearálaš eallimiin. Go son lei loaktán buot, de bodii hirbmat nealgi dan eatnamii, ja son gillágodii headi.

Dalle son beasai spiidnegeahččin muhtun rikkis olbmái. Son livččii hálidan deavdit guoros čoavjjis spiinniid biepmuin, muhto sutnje ii addon dat ge.

De son jurddasišgodii: «Mu áhči bargiin lea biebmu valjis, ja mun lean nealgume jámas. Mun vuolggán áhččán lusa ja dajan: «Áhčážan, mun lean dahkan boastut almmi vuostái ja du vuostái. In mun leat šat dan árvosaš, ahte galgган gohčoduvvot du bárdnin. Váldde mu dábálaš bálkábargin.»

De son vulggii ruoktot áhčis lusa. Juo guhkkin áhčči áiccai su. Son viegai bárt-nis ovddal ja salui ja cummistii su.

Bárdni dajai: «Áhčážan, mun lean dahkan boastut Ipmila ja du vuostái. In mun leat šat dohkálaš gohčoduvvot du bárdnin.»


Muhto áhčči dajai bálvváidasas: «Dopmet viežžat čábbámus biktasiid ja gárvvuhket sutnje daid, bidjet suorb-masa su surbmii ja gápmagiid su julggii-de. Vižžet buoiddes gálbbi ja njuvvet dan, de boradehket ja ávvudehket. Mu bárdni lei láhppon ja lea fas máhccan.»

Ja sii ripme ávvudit.

Boarrásit bárdni lei dalle giettis. Go son lei boahtime ruoktot ja lahkoniid dálu, de gulai čuojaheami ja dánsuma. Son čurvii muhtun bálvá ja jearai mii dáhpa-huvvá.

Bálvá vástidii: «Vielljat lea boahtán ruoktot, ja áhččát lea njuovvan buoiddes gálbbi danne go lea ožžon su dearvan ruoktot.»

Dalle boarrásit bárdni suhtai, ii ge



hálidan mannat sisa. Áhčči bodii olggos ja geahččalii oažžut su mielde ávvudeap-mái.

Muhto son vástidii: «Mun lean bargan du buorrin buot dáid jagiid, in ge leat goasse dahkan du miela vuostái. Munnje it leat addán gihci ge vai livččen sáhttán bovdet ustibiiddan guossái. Muhto go vielljan, guhte lea geavahan buot

rudaidis badjelmearálaš eallimii, boahtá ruoktot, de njuovat sutnje buoiddes gálbbi.»

Áhčči vástidii sutnje: «Bártnážan! Don leat álo leamaš mu luhtte, ja buot mii gulaš munnje, lea du. Muhto dál lea buorre ágga ávvudit ja illudit dasgo vielljat, gean jáhkiimet jápmán, eallá. Son lei láhppon, muhto lea gávdnon.»